

INTERVENSAUN POLÍTIKA: “POZISAUN BANKADA CNRT BA APROVASAUN PROPOSTA ORSAMENTU JERAL ESTADU 2020 IHA SESAUN JENERALIDADE”

02 de outubro de 2020

Maluk Sira-Hotu, Loron Di’ak ba Ita-Hotu!

Tuir enkuadramentu legal katak ezisténsia VIII Governu ne’ebé moris husi Violasaun Konstituisaun RDTL, iha ninia Artigu 106, Artigu 112, Artigu 86 (f) no Artigu 99, la-iha Lejitimidade Konstitusional atu apresenta fali Proposta Orsamentu Jeral Estadu 2020, ka kualker Orsamentu Jeral Estadu ba Parlamentu Nasional. Alein-de ne’e, tuir aplikasaun loloos ba Konstituisaun RDTL, tuir Artigu 86 alínea f, Parlamentu Nasional rasik mós tenke hetan ona DISOLUSAUN, a partir husi loron 18 Marsu 2020, tuir Prazu Konstitusional loron neen-nulu kuandu la konsegue aprova Orsamentu Jeral Estado.

Bazeia ba regras konstitusionais sira ne’ebé mensiona iha leten, maka Bankada CNRT konsidera katak VIII Governo, ne’ebé Prezidente da República maka hahoris, Governu de faktu ne’e la-iha Lejitimidade Konstitusional tamba, tuir Prinsípius de Estadu de Direitu Demokrátiku nian, Governu ida-ne’e la bele kontinua eziste.

Alein-de ezisténsia VIII Governu ida-ne’e viola Konstituisaun RDTL, VIII Governu mós viola Lei Orsamentu no Jestaun Finanseira, tuir Artigu 30, kona-ba, “Prazu Apresentasaun OJE”. Númeru 1 husi Artigu 30 LOJF hateten katak, “Governu apresenta ba Parlamentu Nasional, to’o loron 15 Outubru, proposta de lei Orsamentu ba tinan finanseiru tuir mai”. Ida-ne’e dehan katak, prazu atu apresenta OJE 2020 maka monu (mais tarde) iha loron 15 Outubru 2019, maibé ohin, ita iha ona 2 Outubru 2020 – ne’e katak, LOJF LA FÓ fatin ba VIII Governu de Faktu Inkonstitusional ne’e atu apresenta OJE mai iha Parlamentu Nasional.

Lei Orsamentu no Jestaun Finanseira, iha ninia artigu 30 númeru 2, hakerek momoos katak, prazu ba apresentasaun orsamentu nebé mensiona iha númeru 1 husi artigu 30 ne’e, SÓ LA APLIKA bain-hira: a) Governu em funsaun hetan demisaun, b) Mosu tomada de posse ba Governu foun, c) Mosu lejislatura foun.

Povu Doben Timor-Leste,

Proposta OJE 2020 ne’ebé Governu de Faktu Inkonstitusional submete mai iha Parlamentu Nasional ida-ne’e, ho montante \$1.497,1 biliaun de dolares, ami hare’e katak:

- Kompara ho OJE 2019 ho montante 1.241,5 biliaun de dolares Americanos, tuir alokasaun ba tabela ezeekusaun “duo-decimal 2020”, hatudu iha aumentu de 21,4% iha Proposta OJE 2020.

- Ezekusaun OJE 2020, iha 9 meses, ezeekuta deit 49% no restu 51% (\$759 milhões) atu ezeekuta iha fulan-Novembru to’o fulan-Dezemburu 2020, tuir data submisaun de orsamentu nian.

- Questão maka ne’e, iha fulan 9 nia laran, uza de’it osan metade, metade orsamentu ne’ebé la uza ne’e bele gasta iha fulan-rua nia laran ka lae?

Aumentu osan, iha proposta OJE 2020, hatudu katak la-reflete kapasidade VIII Governu de Faktu Inkonstitusional nian, tanba Governu la-iha liu “kapasidade” atu bele ezeekuta, hanesan hotu-hotu bele hare’e iha Portal de Transparência. Tuir relatório Ministério Finansas, ezeekusaun atual plus obrigasaun iha “rejime duo-decimal”, to’o loron 17 fulan-Setembru 2020, Governu ezeekuta de’it \$526.9 milhões de dolares, representa 49%. Ne’e hatudu momoos katak, Governu ida-ne’e laiha duni kapasidade atu implementa orsamentu.

Preocupação Bankada CNRT nian mak ne'e - orsamentu liu metade proposta OJE 2020 (+/- \$745 milhões) bele ka lae ezekuta iha fulan-rua (Novembru no Dezembru) nia laran, kuando, iha fulan 9, só bele ezekuta deit \$526,9 milhões?

Maluk sira, tanba gânançia ba osan, ita bele dehan katak Governu lakon tiha Sentidu Estadu atu poupa osan Fundo Minarai nian, núdar fundo rezerva obrigatóriu para bele benefísia mós ba jersaun futura. Karik ita la foti husi Fundo, sei bele hetan funan, duke ita hasai tiha hotu maibé labele gasta. Át liu maka bain-hira proposta OJE 2020 aprova tiha, maka Ministériu hotu-hotu rame-rame halo virement-transfere ba categoria transferências públicas hodi bele gasta iha tempu semana-ida ka rua nia laran karik? Ita mós bele haré malorek katak, Estadu de emergjênsia hamosu projetus de emergjênsia arbiru deit ona!!!

Hanesan mós alokasaun osan ba RAEOA iha transferências públicas hamutuk \$76 milhões de dolares. Kona-ba Ezekusaun “duo-decimal” OJE 2020, iha RAEOA, la-ia informaun tanba relatóriu la klaru ho programas ne'ebé sira aprova. Hahalok ne'ebé Presidente RAEOA Uluk adopta, ohin, sei kontinua adopta núdar “lisaun ba mal-prátika” iha mandatu foun ne'e. Alokasaun osan bo'ot ba projectos sira, hamosu dúvidas barak, tanba iha fulan-rua nia laran sei labele ezekuta osan ne'e hotu, tuir normas legais no leis ne'ebé iha. Karik halo virement-transfere ba transferências hodi fahe de'it, hodi sosa votos ne'e bele lalais.

Kuandu lai-ha transparénsia iha uzu orsamentu ne'e, hamosu espekulasaun, “dalaruma osan hirak ne'e atu lori ba selu Ró-Haksolok, tanba Presidente foun RAEOA deklarara ona katak, iha tinan 2021 sei lori Ró-Haksolok atu halo Povo Atoni Haksolok”. Bankada CNRT husu ba Câmara de Contas atu tau matan ba situasaun hirak ne'e... hodi husu ba Governo Português bele loka investigasaun ida ne'ebé independente no viável.

Maluk sira,

Efeitus negativus husi inkapasidade Governu ida-ne'e, resulta resesaun ekonómika ho ekonomia Timor-Leste tuun ba negativu 6-7%, iha tempu agora.

Bankada CNRT nota momoos, hosi audiénsia ne'ebé halo ho Ministériu Petróleu no Minerais iha loron 25 Setembru 2020, katak VIII Governu de Faktu Inkonstitusional ida-ne'e la-ia seriedade atu defende rikusoin povu Timor-Leste nian, hodi bele lori kadoras Greater Sunrise nian mai Timor-Leste, no iha liu tendénsia atu lori kadoras Greater Sunrise ba Australia.

Estrutura Foun husi Timor Gap no ANPM hatudu de'it sentidu pesimista katak, dalan atu lori Kadoras Greater Sunrise mai Timor-Leste ne'e sei todan tanba tenke iha konsensu ho Australia. Afirmaun ida-ne'e... afirmasaun falsa no la iha baze.

Timor-Leste iha Asoens 56,56%, mas tenki hakruuk fali ba Austrália, em vez de decide iha Joint Venture? Prezidente Timor Gap no ANPM konsidera katak, Timor-Leste sei depende ba Australia no Kompañia Joint Venture sira-nia desizaun atu bele lori Kadoras Greater Sunrise mai Timor-Leste ka lae. Ne'e hatudu loloos kedas katak la komprende prosesu ne'ebé hala'o tiha ona. Maibé, át liu mak ne'e: - iha Proposta de Lei Orsamento, ne'ebé diskute dadauk ne'e, hakerek kona-ba desenvolvimentu Kosta Sul; Ministro ho Prezidente Timor GAP no ANPM tenki husu ba Parlamentu atu muda tiha hakerek sira ne'e, tanba lae, sira rasik mak viola Lei de Orsamentu Jeral do Estadu. Inkonsistênsia hanesan ne'e mak ita bele hare'e iha PPL tomak.

Povo rona na'in sira, Governu soe hela rai rahun ba ita-nia matan, tanba ita-hotu hatene katak **BELE LORI KADORAS MAI TIMOR-LESTE**. Tanba-ne'e, dalan seluk la-ia ona, sé de'it mak ukun tenke asegura Povu nia ejizénsia ida-ne'e. Kadoras tenke mai iha Timor-Leste!

Tanba tempu la'o ba oin dadaun, no Kampu Banyu Undan ne'ebé kontribui ba Fundu Minarai mós besik atu hotu ona, nune'e Bancada CNRT hanoin katak:

- Ministru Petróleu no Minerais, Prezidente Foun Timor Gap, no Prezidente Foun ANPM, tenki hatudu ba Povu tomak, katak sira-na'in 3 iha razaun duni atu VIOLA LEI do ORSAMENTU JERAL DO ESTADU 2020, ne'ebé orienta hela ba dezenvolvimentu kampu Greater Sunrise no Kosta Sul. Governu de Faktu inkonstitusional ida ne'e, labele hato'o de'it nia sentidu pesimismu no la-ihha tiha vontade atu defende direitu povu Timor-Leste nian, ne'ebé mak ezije atu lori Kadoras Greater Sunrise mai iha Timor-Leste.

- Labele soe rai-rahun ba Povu hodi lakon tempu, tanba iha 2024 minarai iha Kampu Bayu Undan sei maran. Atu halo estudos foun, sei lori tempu hira? Estudos sira ne'ebé halo ona ne'e, tenke prova mai Povu katak nia ladiak iha ne'ebé!!! Presiza loke ba diskusaun públika... tanba Povo, Na'in ba Riku-soin ne'e, tenke hatene.

Maluk rona nain sira,

Bankada CNRT hamutuk ho povu maioria sei TRAUMA hela ho Fretilin nia polítika ne'ebé, iha tempu nia kaer ukun, penhora tiha RDTL nia soberania Tasi ba Australia to'o tinan 50. Tanba-ne'e, CNRT lakohi atu VIII Governu, de Faktu Inkonstitusional ida-ne'e, entrega tán Kadoras Greater Sunrise ba Australia. Estadu labele sakrifika fali esforsu no vitoria boot Maun Boot Kay Rala Xanana Gusmão, ne'ebé hamutuk ho Timor-oan sira halo Timor-Leste manán tiha Fronteira Marítima, hodi agora, Governu de faktu Inkonstitusional ida-ne'e tau fali kadoras Kampu mina no Gás Greater Sunrise iha bandeja hodi entrega ba iha Austrália. Povo tenke matan moris no Neon na'in! Ida-ne'e labele akontese. Uluk, ema balun simu osan; keta halo, agora ema seluk sei simu fali osan!

Povo Doben Timor-Leste maka ami hadomi,

Hó razaun Legal, no hare'e husi Inkapacidade Governu, iha ezeekusaun no la-ihha Sentido de Estado atu halo Polítika Poupansa ne'ebé ami esplika liubá, Bankada CNRT foti pozisaun katak iha jeneralidade seidak bele fó voto favorável ba Proposta Orsamentu Jeral Estadu 2020.

Espera katak, ba Debate iha Espesialidade bele hetan explikasaun di'ak no onesta, kona-ba inkapacidade ne'ebé boot duni, hodi nune'e hatún montante osan iha orsamentu, hodi Bankada bele muda ninia pozisaun. Maibé, problema boot ne'ebé mosu iha Audiências nebé hala'o ona mak ne'e: Ministros sira afirma katak la'ós sira mak tau osan, la'ós sira mak hakerek programa, tanba UPMA mak halo mesak, sem konsulta sira, hodi ministros balun mós nem koñese ema sira ne'ebé kaer ukun iha UPMA, ho Austrália mak selu osan boboot de'it.

Ba Orsamentu, Governu ida-ne'e, ita bele bolu GOVERNU de faktu UPMA!!!

Fiar Ân, La'o Ba Oin – FALBO!

Obrigado wain.

Díli, 02 de outubro de 2020

Presidente da Bancada CNRT, Duarte Nunes